



PRESS SECRETARIAT

MINISTRY OF THE PRIME MINISTER & CABINET

Apia, Samoa

Telephone : (685) 63222 ext 746, 747, 748, (685) 24799, (685) 26397

Fax : (685) 26322 Email: presssecretariat@samoa.ws

Press Release

20 Me 2008

1. Suiga i le tau o le Eletise.

Ua faamaonia e le Kapeneta le toe fetu'unaiga o le tau o le eletise o lo'o i ai nei, e fuafua agai i fesuaiga o le tau o le suau'u i masina o Mati, Aperila ma Me 2008. O le tau o le eletise i le masina o Mati e 22.3%, lea o le a si'i atu i le 25.76%, ma o le a fa'amamaluina lea suiga i le Aso muamua o Iuni 2008.

O le tau faaopopo mo le masina o Iuni 2008 o loo taua i lalo:

Vaega o loo faaaogaina le Eletise.	Tau Faavae o le Eletise o loo i ai nei i le Iunite e tasi.	Tau faaopopo ua fuafuaina i le tau o le suauu e 25.76% e amata i le aso 1 Iuni 2008.	Tau atoa i le iunite e tasi e amata atu i le aso 1 Iuni 2008.
i) Tagata Lautele Kilouati Faaaoga/Masina 1 – 50 iunite 51 iunite ma sii atu	58 sene 69 sene	15 sene 18 sene	73 sene 87 sene
ii) O isi vaega uma o loo faaaogaina le eletise 1 iunte ma sii atu	69 sene	18 sene	87 sene

E pei ona taua i luga, o lenei si'itaga fou na mafai ona maua mai i le faaaogaina o le eletise i fesuaiga i le tau o le suau'u i masina e tolu o Mati, Aperila ma Me 2008.

2. Fono Faaletausaga a Komesina o Leoleo o le Pasefika 2008.

Ua faamaonia e le Kapeneta le Fono Faaletausaga a Komesina o Leoleo o le Pasefika 2008, lea o loo fuafua e talimalo ai Samoa mai le Aso 2 – 4 Setema 2008.

E luasefulu atunuu o le a auai mai i lenei fono, ma e aofia ai Sui mai Niu Sila ma Ausetalia. O loo fuafua e ono o’o atu i le limasefulu le aofai o Sui auai ona e aofia ai ma faletua o Komesina, Ofisa Lagolago ma Sui o faalapotopotoga e fai paaga ma Ofisa Leoleo i Atunuu o le Pasefika.

O lenei fono e faia i tausaga uma e talanoaina ai mataupu mo le aga’i i luma o auunaga faaleoleo i totonu o le Pasefika. O le a talanoaina ai foi auala e faafaigofie ai ona galulue faatasi atunuu o le Pasefika i le faatinoga o auunaga faaleoleo, faapea ma le faafaigofie o fesoasoani e ono mo’omia mo le faatinoga o ia auunaga pe a manaomia.

3. Lipoti Fono i Take.

Ua faamaonia e le Kapeneta le lipoti o le Fono Faapitoa a le Malo o Take ma sui o Malo o le Pasefika lea na usua i Istanbul, Take mai le aso 9 – 11 Aperila 2008.

O lenei fono faapitoa o se valaaulia mai le Malo o Take ona o le latou naunauta’iga e faamalosi ma faamautiina le va galulue ma atunu’u o le Pasefika e le gata i upufai faavaomalo, a e faapea foi nisi o atina’e e mafai ona galulue so’oso’otauau ma le Pasefika e aofia ai ma Samoa.

O mataupu taua sa soalaupuleina i lenei fono e aofia ai:

- i. Auala e faamalosi ma faamautiina ai upufai o Malo o le Pasefika ma le Malo o Take;
- ii. Vaega e mafai ona galulue felagolagoma’i ai ma Malo o le Pasefika e pei o le fesoasoani mai i atina’e a Malo o le Pasefika;
- iii. Suiga ma a’afiaga o le Tau ma taumafaiga e puipui le faaleagaina o le si’osi’omaga aemaise ai o a’afiaga i tagata tafafao mai fafo; ma
- iv. Le toe faamanino o faiga faavae faavaomalo a Take ma le faamalamalama o le latou tamaoaiga.

Na maua foi le avanoa e feiloai faapitoa ai le Usugafono a Samoa ma le Minisita o le Vaifafo a Take, le Afioga Ali Babacan. I lea fono faapitoa sa faamautiina ai pea le galulue fa’apa’aga o le Malo o Samoa ma le Malo o Take e pei ona amataina i le tausaga 1979. Sa tuuina foi i le Malo o Take se talosaga mo se fesoasoani i nisi o atina’e a le Malo o Samoa e pei o le Ofisa Fou mo le Matagaluega o le Soifua Maloloina, faatasi ai ma ni atinae o loo fuafuaina e le Matagaluega o Faatoaga.

O le Minisita o Faamasinoga ma le Faafoeina o Tulaga Tau Faamasinoga, le Afioga Unasa Mesi Galo, sa fai ma sui o Samoa i lea Fono, faatasi ai ma le Ofisa Sili o Pulega o Faamasinoga ma le Faafoeina o Tulaga Tau Faamasinoga, le Susuga Masinalupe Tusipa Masinalupe.

4. Lipoti Fono Faaletausaga a Faatonu o le PASO.

Ua faamaonia e le Kapeneta le Fono Faaletausaga a Faatonu o le PASO, lea na faia i Vanuatu Aso 28 Aperila 2008 – 1 Me 2008.

I lenei fono, sa maitauina ai le maoa'e o le tula'i mai o le Faalapotopotoga o le PASO i se tulaga lelei talu ona tofia le alo o Samoa, le Susuga Seiuli Alvin Tuala, e avea ma Pule Sili. I mataupu sa talanoaina, ua i ai se fuafuaga e amatalia se auaunaga manaomia mo Su'esu'ega Faapitoa mo atunu'u o le Pasefika e pei o Vanuatu, Solomona, Nauru faapea ma Papua Niu Kini. O loo tapena i le taimi nei se Feagaiga mo ia auaunaga e fuafua mo Samoa, aua se finagalo malie o le Kapeneta mo lona faatinoga.

O lenei fono na auai atu i ai le Ofisa Sili Lagolago mo Vaalele Sivili, le Susuga Magele Hoe Viali, faapea ma le Pule Sili Lagolago mo Auaunaga i le Ea, Pulega o Malae Vaalele, le Susuga Junior Ueta Solomona.

Government Press Secretariat